

四庫全書

集部

欽定四庫全書

集部

敬軒文集卷五

詳校官編修臣瞿槐

中書_臣劉源溥覆勘

總校官庶吉士臣何思鈞

校對官中書_臣李斯咏

謄錄監生_臣馮國柄

欽定四庫全書

敬軒文集卷五

明薛瑄撰

絕句

朝回行堤上

御溝行處早春回
春水平堤不起埃
柳綠蒲青無限好
客邊襟抱一時開

簡焦李羅劉四侍御五首

綠柳紅葵滿憲臺幾陪簪笏共徘徊昨朝一別長官去

直到新年院裏來

末用韓句

文明門外水悠悠妓子歸來雨打頭却笑道人心似鐵
久無飛夢到青樓

鐵扇都門鎮日開無風車馬也塵埃雷公不吝連朝雨
洗盡炎蒸一快哉

每憶清談對數公別來無日不從容少陵自是能詩者
却笑樽中酒屢空

黃榜同年雙進士青壇並榻兩先生四君高論應難及
別後深知鄙吝萌

讀劉靖脩黃金臺詩

賢者何曾為此來黃金空復壘高臺先生志節超千古
一曲清風溢九垓

再懷沅州五友五首

沅陽清氣滿烏臺為有脩篁繞戶栽兩載好風明月夜
新詩誰對此君裁

無端詩興遠誰添紅白雙梅倚畫簷千里中州風雪夜
一窻清月憶湘南

簾捲秋風繞砌花沅陽幾對昔年華關山白露三千里
誰采金英泛紫霞

持贈曾同驛使梅紉香聊爾意徘徊當時九畹花應在
幾向光風爛漫開

薜荔闌邊綠錦池竹亭深坐晚涼時忽成遠道空勞想
秀色天香發向誰

汾上春行

清汾信馬踏春酣
汀草萋萋隴麥蘄
正是煖風啼鳥日
水村花塢似江南

驟寒

曉起題詩硯有冰
苦寒端欲訴玄冥
却思持節荆南道
臘月湖山草色青

河南將歸

我憶汾南田舍好
綠槐如蓋擁高門
南園舊種雙桐樹

應有孫枝到碧雲

忽憶

忽憶輦東峰子嶺入雲遙見大河流中原勝槩皆堪賦
攬轡還當遂壯遊

汾河南岸看杏花二首

兩載東風看杏花汾河南岸水西斜幾回駐馬憐穠艷
只恐春流泛落霞

汾水南邊錦作堆連朝相報杏花开東風好景休虛擲

一日須來一百迴

過壽陽用韓文公韻

征騎雞鳴發大安山深五月尚風寒壽陽舉目孤城近
東嶺金烏爛曉團

憲臺齋宿

憲臺齋宿幾連宵絳燭銀爐伴閨寥斗帳夢回更漏永
只聽窓外冷風飄

喜雨雜詠簡院長諸公八首

聖明端拱太平時好雨當春細若絲應是栢臺添氣象
旋滋花柳更催詩

正是陽和溥萬方知時好雨潤羣芳趣朝共覩天顏悅
應喜斯民樂泰康

霏霏朝雨潤彤庭恭逐鵷行謁聖明白玉橋邊鳴珮過
御溝春水一時生

御溝新柳濕鶯黃佩馬朝回雨露香栢府文書春日靜
相過唯覺和詩忙

栢臺春靜晝厭厭好雨如絲不捲簾最是東君能借力
閒庭草色一時添

雨過西山翠欲流葱葱佳氣滿神州書生莫笑今霜鬢
駿馬看花已償遊

聖主龍飛第一春天垂雨露萬方勻蒼生坐見躋仁壽
自昔賡歌有舜臣

萬國同心奉至尊斯民重見飲衢樽欲知和氣薰天地
只在三春雨露恩

發通津驛三首

六月官船發潞陽水村烟樹共微茫
天門忽已如天上
祇見青山一帶長

新捧天書帶紫泥又承恩旨按三齊
通津南下波連海
渺渺風帆去似飛

五色天書出禁中
儒臣將命按三東
滄波南下通洙泗
魚躍鳶飛總帝功

宿臨清徽省行館

微垣瀟洒九秋天風葉敲窓夜月圓有客乘驄來借宿
新詩留作賃房錢

泉林寺

日午停驂暑氣收
參天古木亂蟬秋
絕憐好景添清興
為寫新詩紀勝遊

夢與陳侍御話舊

分司相見是京華
風節山東向駭誇
邂逅不知身是夢
覺來秋雨濺窓紗

菊開憶去秋同官臺中共賞

去年客裏遇重陽曾與同官摘晚香今日分符行郡邑
獨將遠意看秋芳

嘉祥分司元宵

行臺北面是蒼山古栢風生分外寒又值元宵春一度
謾燒紅燭伴清歡

鉅野道中

鉅野茫茫遠際天春風春雨淡春烟河流尚自成陳迹

俯仰千年事落然

題汶上分司二小栢

霜臺對植長新枝翠葉交承雨露滋
直榦總應無曲處穉年俱有棟梁姿

聞蛙有懷

春晚乘驄駐德平古城牆外有蛙鳴
却思青草池塘夜三載湖南厭此聲

暮春道中見桃花尚開

馬穿新綠過園林已恨穠芳誤賞心猶有小桃花未落
獨留餘艷到春深

鄒平分司雜詠二首

行臺獨坐聽鳴鳩喬木參天五月秋舉目好山青未了
應隨馬足遍東州

樹繞行廊散碧陰鶯啼小圃送清音葵花無數開如錦
解是傾陽共此心

臨淄道中

平郊漫漫樹依依人物千年總已非
多少荒臺芳草合不知何處是三歸

青州分司榴花

石榴小萼未開時渾似紅櫻壓翠枝
照日含風千萬朵故園千里正相思

穆陵關夜雨

萬山絕頂穆陵關一上山樓五月寒
烟樹滿川浮暝色晚風吹雨濕闌干

膠州

幾點青螺海上山參差樓閣海天寬行臺五月不知暑
祇覺侵人海氣寒

栖霞見青桃

來日紅桃尚有花青桃如彈過栖霞無端馬首還東去
直看青山到海涯

栖霞行臺夏日

四山環繞栢臺深綠樹濃交戶外陰還似湖南持憲節

坐聽山鳥弄清音

望嶽

攬轡西來過泰安
拂空青靄掠征鞍
東還算是初冬日
擬上天門次第看

萊蕪懷古

清節誰能似范丹
清名千載重人間
萊蕪縣裏停驂日
坐對南山秋色寒

再詠汶上分司二小栢

一迴相見一迴高
夾砌行看翠葉交
偉器定如房與杜
相期聳壑更昂霄

魚臺分司

翠竹紅榴掩映間
栢臺清晝鳥聲閒
情知物理相關處
心與乾坤一樣寬

三詠汶上分司二小栢

高標離立入簷長
已有清陰近畫堂
別後又看新子結
風生滿院散天香

題松鶴圖

忽驚虛室起潜蛟
雲氣陰森爽氣飄
霜雪不知幾千古
長年惟有鶴來巢

臨朐分司四小栢二首

解是平生獨愛材
新移四栢後堂栽
懸知數百年來後
應有清陰滿憲臺

四栢移來拱把餘
一行分植傍階除
故應雨露均培養
直榦爭看聳碧虛

簡黃仲芳大參三首

正統四年秋九月天官門下識君時神都第一科中客
接踵青雲愧後期

雅量每期黃淑度正人應愧薛居州斯文四海知同調
且喜京華並轡遊

天衢連日踏塵埃忽聽蕭蕭夜雨來明日況逢重九節
好懷應為大參開

十二景為衍聖公孔彥縉賦二十四首

小亭花雨

小結茅亭壘石臺繞亭時雨百花開一襟道氣清如許
更挹幽香滿座來

曾過君家飲小亭醉看紅雨濕春馨別來生意應如昨
長對東風閱聖經

夾道槐雲

夾道槐根孔世家兩行飛蓋影斜要承濃渥千年蔭
不愛秋黃八月花

數仞宮牆一路深
屯雲交翠落青陰
紅塵十丈知何處
祇引薰風養道心

蘭階清露

零露瀼瀼帶曉濃
繞階晴霽轉光風
雲仍對此琴三弄
還與宣尼古調同

九畹移來遍孔家
芳叢時遣石闌遮
故應天意憐香潔
玉露年年潤好花

桐井甘泉

千章嘉樹古梧森一窟寒泉碧甃深靜掃濃陰汲脩綆
清泠長是滌塵心

樹環嘉木桐陰合井冽寒泉地脉通彩鳳九霄應有待
道源千古自無窮

海棠綴錦

長笑時人愛海棠芳姿何事近宮牆自緣要識東風面
任遣花神綴錦粧

綠烟初散錦霞空綽約僊人半醉中莫恠海棠顏色麗

等閒紅紫盡春風

萱草堆金

綠帶春深近北堂更看紅錦爛天香
國風千古遺詩在對此應知百慮忘

自是春風造化機織成錦翠爛相依
細看一種生生意真宰無言識者稀

松窓皓月

拂窻涼籟起秋聲綺席流光皓月明
却憶鄒軻談夜氣

此時心迹已雙清

畫堂松月夜窓虛
宴坐澄心一卷書
莫道畫前元有易
靜中天理亦森如

竹塢涼風

半畝琅玕出短塢
煖烟輕霧碧陰重
開門淨掃蒼苔坐
細葉蕭蕭引好風

戴雨含烟一逕幽
每從長夏數追遊
濃陰深處不知暑
祇覺涼風似水流

苔石疊翠

山骨移來帶蘚痕層巒疊嶽勢飛翻杏花壇裏三春雨
疑是岩間一片雲

氣通霄漢潤通泉融結還從太古年數點青螺雲起處
散為霖雨遍山川

花圃繁紅

煖雲無力趁東風小圃芳菲一逕通若問人間真太極
便應攜手看春紅

參天喬木聖公家應愛春風滿園花還似漁溪窻外草
一般生意浩無涯

古牆秀栢

曲阜城中夫子牆牆頭老栢正蒼蒼托根終古同元氣
未許掄材作棟梁

根蟠厚地榦參天還合宮牆不記年遙想杏壇傳道日
唯應此木見三千

方沼瑞蓮

珍重當年太極翁，曾將道筆寫清通。
孔門自是傳心者，還向方池看夏紅。

玉井空傳太華峯，何如方沼看新紅。
澆培更有如船藕，渣滓都歸渾化中。

行臺雜詠簡黃憲長暨諸憲僚二十首

行臺西接大明湖，細柳新荷入畫圖。
海石風光今古意，品題殊覺少陵孤。

獨宿行臺暑氣清，清吟已覺動高情。
令人苦憶黃詩伯，

肯許連床聽雨聲

楊柳陰陰憲府深讀書因見聖賢心
鍾期去後今千載誰復人間是賞音

獵獵風蒲水滿塘輕陰微雨芰荷香
偶來乘興觀時物徐步芳洲趁晚涼

烟籠庭樹水侵階隱隱輕雲細雨來
爽氣已添煩暑退好懷千古一時開

綠柳紅葵滿憲臺清渠碧沼斷塵埃
城頭雨過天無際

高鳥孤雲自往來

菰蒲深處水禽鳴
雨過林塘晚更清
露滿碧荷看不定
祇疑仙掌萬珠明

栢臺清晝鳥聲閒
影落高梧夏日寒
且喜輕陰天際歛
開門咫尺見南山

水滿方塘蓋錦萍
軟風高下颺蜻蜓
清宵雨歇蛙聲急
却憶湖湘草色青

萬朵紅葵折錦苞
新粧相倚鬪妖嬈
道人獨愛傾陽意

併起丹心憶聖朝

行臺直北是高城城外溪流面面清更擬濠梁尋勝事
觀魚多有昔人情

明時叨秩意何如秖向行臺讀古書自得自歌還自樂
青天白水看鳶魚

四月行臺暑雨過方池無數長新荷貪觀物意歸來晚
楊柳薰風到面多

瀟洒流年老鐵冠髭毛雖白寸心丹天書重疊叨天寵

驄馬長鳴宇宙寬

耿耿江湖意不忘
頻年草疏奏明光
行臺夏日看時物
最愛葵花向太陽

憶捧天書別九天
分符頻與歲時遷
行臺幾度逢佳節
五月薰風入舜絃

夏雷挾雨急傾盆
風色蒼蒼晚更昏
清曉行臺看雙沼
新荷已沒舊波痕

泰山觸石雲初起
六合茫茫一雨同
試聽康衢應有頌

調和玉燭聖明功

繞屋葵花錦作圍
盡墻墻外柳依依
日長庭院遊絲靜
乳燕穿簾自在飛

萬頃平湖接憲臺
紅蓮如錦望中開
何當與客凌飛閣
更攬山川入壯懷

題趙雍畫馬三首

逸氣稜稜不受羈
蒼林磨痒立多時
會應有待王良馭
掣電追風始見奇

白面驪駒汗血乾風鬃倚樹玉蹄攢誰人為制青絲絡
騎出橫門萬衆看

玉馬王孫已入周曾將絕藝寫騂駟謾誇有子能傳業
不道東陵有故侯

讀嶧山碑

李斯篆

六國平來四海家相君當代擅才華誰知頌德山頭石
却與他人戒後車

重題臨朐行臺四栢二首

四栢移栽已二年重來相對意留連
時人莫比甘棠樹
淺薄慙無惠化傳

憲府重來栢漸高良材元不因蓬蒿
還應老大驚人目
香葉園空有鳳巢

重題膠州行臺二首

六年三按古膠東兩見葵花五月紅
却憶端陽霑賜扇
曾陪鴈侶覲飛龍

留題今是兩端陽海氣仍飄五月涼
却愛名花當戶發

還將遠意采幽香

四景為李通政賦四首

石橋流水自東西綠樹連雲翠嶂低却憶當年持憲節
扁舟曾泛武陵溪

紅塵飛不到青山宛轉橋東水閣寒立盡夕陽橋上客
看山看水不知還

木落霜青水不波野人茅屋帶岩阿幽林採得憐香潔
坐對南山興最多

竹林茅屋枕江皋，疊玉峯巒夾岸高。似是剡溪清興發，
獨衝風雪泛輕舠。

四景為張給事題四首

雲滿青山水滿溪，百花如錦草萋萋。少陵詩思知多少，
到處嬌鶯恰恰啼。

百尺清潭萬仞山，山圍水閣下虛寒。道人已自無焦火，
況在山光水色間。

無邊草木不禁霜，只有黃花晚更香。笑採黃花斟美酒，

南山咫尺興難忘

仙家樓觀鬱嵯峨
雪嶺冰溪眼底過
驢背探春春信早
詩情不必灞橋多

齋宿雜詠十首

高堂燈火夜相親
點檢詩書憶古人
自愧久持三尺法
一生長保寸心春

霜竹風寒夜向深
燈前讀易見天心
京華又是逢長至
坐憶堯夫子半吟

再入霜臺持憲節又承丹詔育菁莪只今理寺通朝籍
倍覺天恩滾滾多

燈花靜夜結金蟲爐火其如樹杪風小閣有春應自省
此心期與萬人同

法從追陪二十年寸心期不愧先賢士師自是庭堅職
尚憶虞廷詠勅天

馬蹄頻踏暮街塵理寺歸來月色新靜室有心空自省
忘言相對是何人

金門待漏三更月玉陞趨朝五色雲補袞即非樗散質
微誠長祝聖明君

跡忝鵷行第幾班朝回馬上看西山雪崖氷谷清如許
咫尺烟霞未可攀

待伴未消意外雪宜人偏愛竹間風齋居已自心如洗
况與寒宵山景同

都城鍾鼓夜深沈棘寺燈前有客吟不是少陵耽麗句
虛臺元是發清音

題陳希夷圖

白雲回首是三峯宴坐蒼苔睡正濃人世紅塵渾斷絕
野花啼鳥自春風

題枯木竹石四首

野渚春容

荒溪野渚曲流通蒼翠巒坼淑氣中瀟洒一般春意思
紛紛紅紫挹高風

臨波春意

蒼玉生苔浸綠波
新篁老木散枝柯
徒勞人世歌招隱
淡蕩東風野興多

淡靄涼生

扁舟幾度泛湘波
老木疎篁翠石多
涼吹淡烟圖畫裏
遠懷清絕奈秋何

蕭騷霽雪

山間昨夜雪三尺
曉雲如拭天無痕
恠得清聲滿人世
石林凍竹風翻翻

絕句三首

一室無塵靜有餘清風頻度小窓虛韋編讀罷心如水
閒看浮雲自捲舒

擾擾征途二十年蕭蕭短髮賦歸田青山綠水都如舊
得失升沉事落然

早知大道心無外始覺身閒樂有餘一卷陶詩千載興
悔將名利役慵疎

絕句四首

疎懶經旬不出門炎風暑氣任昏昏飢餐渴飲披書卷
高卧開窓看白雲

憶昔曾遊海上山夏雲冬雪滿征鞍如今羸得身無事
一榻清風白晝閒

長江風起浪如山驛路紅塵幾往還三十年前回首處
烟蓑依舊釣磯閒

年少爭名老可羞青山綠水去來休是非得失何須問
已是忘機伴白鷗

汾上春日二首

道邊桃李綠陰繁
花落難招萬片魂
只有清汾流不盡
年年長是繞孤村

汾水春流岸岸深
水村新綠滿春林
殘紅已逐東風盡
不道遊人負賞心

宿青橋驛聽江聲

青橋驛近黑龍江
江上灘聲暗入窻
高枕纔眠過夜半
驚迴旅夢正淙淙

草涼樓驛

翠華西幸駐山間
草閣乘涼動喜顏
何似長安歌舞地
鳳樓千尺更高寒

朝天驛

征驂行盡褒南道
又上朝天驛畔舟
兩岸雲林青未了
嘉陵南去水悠悠

盆池魚

浮游南北與西東
不出區區斗水中
何似巨鱗居大海

波涵天地浪搖風

泛川江有感

雙親未老我童年曾泛岷江六月船
今日重來泛江水
我衰親沒淚潛然

夏夜宿龍瓜驛

風樹颼颼雨不休夜眠江館似深秋
夢回忽見窓前燭
驛吏催人又放舟

效竹枝歌三首

錦官城東多水樓蜀姬酒濃消客愁醉來忘却家山道
勸君莫作錦城遊

江上小樓開戶多蜀儂解唱巴渝歌清江中夜月如晝
樓頭賈客奈樂何

楊柳矍矍天欲明錦江夜雨江水生鹽船無數惡年少
閒上江樓看曉晴

却贈

有人情重贈尤多奈我中心義理何縱使盡添齊楚富

一身之外總為他

放船

野曠天低江面平
放船東下好風清
江天況值新晴霽
雲白山青望眼明

江行

兩岸好山看不盡
一江烟水去無窮
誰人為和滄浪曲
興在空濛杳靄中

平羗望峨眉山

峨眉盡出天邊秀青到平羌尚未休山月半輪懷李白
扁舟我亦下渝州

讀史二首

漢唐末事誰能鑑晉宋當年世所知猶有一編青史在
悠悠長使後人悲

東言來若用言難不用忠言亦等閒若信當時江統論
定無戎馬到長安

除夜

又逢除夜客西川銀燭金爐白髮前却憶去年京邸夜
朝衣新試候朝天

蜀中元夕

京華西蜀兩元宵總去家山道路遙來歲乞歸逢此夕
故鄉燈火沸笙簫

成都看梨花

錦城風暖不生塵開遍梨花萬樹春吹散綠雲簾盡捲
廣寒宮裏有仙人

看木瓜花

杏艷桃夭二月終
好花難比木瓜紅
回頭總愧青青栢
生怕林間一夜風

詠史

平吳四海盡為家
內苑新添萬樹花
祇喜羊車遊別院
不堪軹道駕牛車

戲題則天鄉

無端險惡山川氣
盡付當時武媚娘
淫虐千年遺臭在

至今人唾則天鄉

紀行口號

襄陽曾渡漢江水
嶠冢還尋漢水源
自笑苦無經濟畧
道途何事往來煩

自朝天驛回京

去春舟發朝天驛
今夏朝天嶺上回
水陸朝天行已遍
朝天從此上金臺

太常許卿送菜戲簡十首

為謝東隣許太常嘉蔬頻送意難忘呼童帶葉連根煮
咬得其中一味長

摘送園蔬露未乾虀成新味帶鹹酸幾回放筯詩腸飽
絕勝先生苜蓿盤

空堂養病似齋居喜送東園幾種蔬喫此久無烹宰事
不須仍用遠庖廚

白髮青袍老寺丞卜居喜近太常卿故知氣味多相似
頻送東園菜把青

菜出東園種種新太卿相送意何親平生自是甘清味
肉食能無愧古人

園蔬新拔帶霜濃煮香根放筯空誰識其中有真味
不須苦羨紫駝峯

自笑官貧氣尚豪黨姬休復論羊羔卿家能送東園菜
清味還應厭老饕

此色斯民不可有此味廟堂不可無顧我已非調燮手
先生相送意何如

雅契名卿柰若何嘉疏頻送意尤多生平味此無厭足
恐似當年喫菜魔

京華交契似君稀白首相看意不違忽見名園送新菜
故鄉老圃倍思歸

徐州見黃河

吾家正在龍門下流出黃河幾曲長忽向徐州城外見
牽情一水正思鄉

燕子樓

孀妾當時一女流猶知守節度春秋往來忘義忘仁者
莫上彭城燕子樓

戲馬臺

八千兵渡大江來戲馬高臺亦壯哉何事烏江驢不逝
高臺翻使後人哀

陵母墓

鹿走中原海起塵獨從草昧識真人紛紛都是人間死
母死高名萬古新

呂梁洪

長洪幾折奔流急亂石兩崖還疊重被髮行遊渾不見
往來舟楫自匆匆

過淮陽有感而作

武皇側席正求賢直道誰居汲黯前何事不教留禁闥
淮陽高卧度流年

高郵露筋廟二首

高郵女子志何堅假宿寧論性命全甘向荒陂死蚊喙

此生元不愧蒼天

噴血其如利鬚何荒陂一夕死貞娥從教筋骨當年露
羸得清名世不磨

渡江

儀真北上念三年又上江南濟渡船清曉登艫望京國
鍾山彷彿翠雲連

望南京

虎踞龍蟠入望邊鍾山瑞靄翠相連仰思聖祖開洪業

定鼎宜過憶萬年

題雙鵲圖

梅竹交青映栢枝飛來雙鵲立多時
主人翁好無彈射有喜令渠日日知

太平門

何處清時快往還太平門外好湖山
閒花野草應無數惟有青松最耐看

大理後庭竹林山色二首

鍾山雨過翠成堆
竹裏清風作陣來
愛竹看山有真樂
高人遠矣憶追陪

閒愛脩篁靜愛山
清陰秀色座中看
老來漸得悠然趣
天際浮雲任往還

臨終口號

土牀羊褥紙屏風
睡覺東窓日影紅
七十六年無一事
此心惟覺性天通

青城分司暮春

漠漠楊花滿院飛重來又見一春歸去年記得停驂日
正月庭前雪作圍

題松竹梅圖

翠竹青松共白梅幾枝瀟灑出塵埃長年自保風霜節
不學春紅向煖開

濮州道中口號

歲月多從馬上過勳名未立鬢先皤風霜滿面誰能識
極目蒼天一放歌

舟發辰溪岸

岸脚挿江深，洄潭搖石影。
舟行若天游，妙處心獨領。

靜夜

雨滴霜臺靜，燈明憲府深。
新詩吟謾好，誰復是知音。

題墨蘭二首

已見光風轉，應知九畹深。
殷勤采香潔，持慰美人心。
既自充楚佩，還曾入孔琴。
寄言采芳者，雲谷莫辭深。

秋夜

泠泠碧窻風皎皎疎簾月重門掩秋霜素練擣寒雪

荒逕

曉行荒逕中穰穰草上露日出雲氣收一鳥空中度

夜飲李海昌宅

重門敞春夕燈燭霽餘輝醉我百壺酒留連夜未歸

早起

雞鳴耿不寐展轉待明發童子看窻前猶言有殘月

早發


晨星耿孤色曉月餘清朗舟人解纜行夢覺波聲響

野市

野市二三家柴門傍水斜溪童賣蒲笋歸路不辭賒

率成

舟過水無迹雲收天本清外物自紛擾吾心良獨明



敬軒文集卷五

欽定四庫全書

集部

敬軒文集卷六

詳校官編修臣翟槐

中書_臣劉源溥覆勘

總校官庶吉士臣何思鈞

校對官中書_臣李斯咏

謄錄監生_臣馮國柄

欽定四庫全書

敬軒文集卷六

律詩

送和司訓

秋色滿平陰
秋聲處處砧
離筵對衰草
別路繞疎林
白日青霄迥
紅雲紫極深
此行應得意
早晚報佳音

久雨遣懷六首

明薛瑄撰

客居連市井積雨竟朝昏屋漏頻移榻泥深少出門
窻風侵座冷簷溜入宵繁賴有詩驅悶無勞問酒樽

秋來常苦雨風氣早生寒小鳥投林急高鴻下食難
奔流淹古道客霧隱前山試誦停雲句中懷獨未寬

連日對秋雨其如客思何泥塗寧出戶流潦欲成河
生茵井闌遍積苔牆角多無由訪知己遣興且吟哦

沉寯不可出茅齋靜坐時懷賢尋往傳課子誦新詩
近悟柔為勝深知巧是非雨聲雜涼吹蕭颯發清機

客雨洒如絲涼風散漫吹泥途殊汨沒茅舍久淋漓秋
意心先得蟲聲耳獨知田家望收穫何日靜雲霓
小窓聽雨坐燈影照孤吟誰識無邊道元同不外心
襟澄夜氣簷溜滴清音詩就無餘和悠悠思轉深

寄東忠周司訓二首

良夜對床宿清晨送子行西郊雨新霽古道馬頻鳴執
手別時話揮鞭獨往情相思杳難極鴻雁帶秋聲

過我衡門下秋宵雨歇初繁星隨漢闕明月到窓虛別

數寧辭酒談多不厭書今朝遠相憶陡覺鬢毛疎

謾成

客裏經年久交遊日漸新名浮真自愧知少不生嗔大道終非外微言總是真悠然無所競轉覺快心神

陳廣文見訪

愛客情何厚肩輿到所居樽醪携臘蟻盤錯間春魚雅意忘年契高懷勝日雩劇談移永晝未擬促歸途

挽江處士

處士好靜者放情丘壑間樽前流水遠窓外白雲閒
孫子詩書熟交親禮數寬百年今已矣涼月滿柯山

盧溝橋

沙水相蕩潏晴宵飛彩虹闌干臨極浦華表撼高風
爽氣西山秀祥雲北闕濃南征從北發歸擬駐華驄

入湖南界

行盡中州地湖南境界初漸聞人語異更訝鳥音殊
溪谷多栽稻池塘盡養魚山村聊借宿風月夜堂虛

應山道中

萬壑嵐光滿曉騎
驄馬行茂林交擁蓋
脩竹送前旌到
面溪風冷經心石
澗清豺狼應遠迹
孤鼠不須驚

晚至雲夢

雲夢行看近肩輿
趁晚涼稻塍新穗吐
蓮沼落紅香密
樹隱茅屋蘓堤繫
野航霜臺絕蕭洒
容我得徜徉

發雲夢二首

鞍馬幾千里又登雲夢舟
天圓平野闊水入大江流
笑

瓦居人閣杉脾賈客房且看風景異未覺遠遊傷

辰溪曉泛五首

沅水一千里辰溪又泛舟山雲合雨暗身世與天游已
覺雞聲遠惟聞櫓韻幽所經多險涉還似解離憂

湛湛江流碧層層石岸高蠻謳催健舫瘴雨洒輕舸自
勗冰霜操寧辭旦夕勞五溪山萬疊何處是龍標

怪石雙崖峻秋江一道平榜人皆異語岸鳥亦殊聲洞
戶編茅小蠻舟剡木輕雖驚風土異重喜萬方清

蒼峽幾千尺天開萬古餘波穿石眼瘦舟壓水心虛歷
歷瞻奇秀悠悠想化初所希觀物妙難覓邵堯夫
自有烟霞分觀風任所之洞餘槃瓠種江遶伏波祠秋
老芙蓉樹雲深薜荔絲欲知消遠思祇是詠新詩

舟發長沙四首

曉溯湘江水微風漾碧波好山隨岸遠野燒入林多往
哲題詩處今予鼓棹過年來遊覽數天意遣吟哦

已覺長沙北猶瞻岳麓西天浮湘水闊樹入楚山低岸

芷餘香草叢篁染舊啼昔賢遊覽地我亦為留題

長沙城下驛解纜發扁舟水柵千家市沙村十里洲
喜逢晴霽景況值太平秋憲節叨光寵懷賢獨未休

十日長沙住登舟憶少陵花飛有底急酒美為誰傾
浩當年興悠悠此日名幸逢明盛世持斧故南征

湘鄉道中

湘鄉南去路連日是山行地僻溪潭綠冬和草樹榮
野人懸稻把

山家以稻作把盡懸於架旋取煮食

古戍列旌旌異俗今如此

歸當話友生

思親

二親俱久逝孤子際明時
繆忝風霜任深承雨露私
光榮寧及養劬育竟何為
願竭涓埃報焚黃會有期

宿湘鄉道中山亭紀懷

又是山亭宿林巒夜杳冥
天臨南嶺近風入北窻清
開卷求心事傾壺蕩客情
二親久辭世不寐想平生

沅州新正書景三首

楚南時節異正月似深春
傍砌萱苗長臨池草色新
江山晴景媚庭院煖風頻
坐惜梅花落題詩憶遠人

頗訝沅州地新正景不同
遠山青草瘴深院落梅風
角角尋巢鳥喧喧采蕊蜂
春衣初試袂和氣滿簾櫳

楚地春來早羣花次第開
輕黃舒柳線重碧染莓苔
永日香凝篆和風酒滿杯
端居叨寵渥何以答涓埃

正月十三日夜書

兩日是元夕山城已試燈
謳歌連夜發蕭鼓遍街鳴
人

喜新風景時逢舊太平
栢臺誰是伴梅月正交清

遣興

庭幽多樂趣向歇愛晴暉
綠竹生孫早紅梅結子稀
賦詩新有趣讀易漸知幾
眼鏡何空闊看雲天際飛

曉上草閣

通宵雷雨驟曉霽試登樓
百鳥聲相和雙江漲合流
寧知冀北客來按楚南州
滿眼波濤急飄然欲放舟

喬口溯流往長沙

楚岫無邊翠湘流不盡清香蘭屈子賦苦竹鷓鴣聲風
景當年事雲霞萬古情沙頭舊鷗鳥誰肯與尋盟

武口守風四首

連日北風疾江濤拍岸鳴天垂平野月浪颭近船燈湖
與歸心闊秋因客思清不眠聽鼓角高枕念王程

武口叢祠下維舟幾日餘北風增駭浪南客念歸途水
遠浮三蜀烟濃暗五湖江村秋雨裏難覓酒家壚

歸思方正切北風何太狂江村平隱見湖樹遠微茫浪

起魚龍伏天低鶴鶴翔
韶裘思更著秋雨早生涼
繫舟楊柳驛風雨苦連朝
遠岸烟埋樹荒村水沒橋
年華身老大湖海興蕭條
天意何留滯應憐望國遙

舟中偶成

舟中如斗室坐卧覺心清
閉戶嫌風冷推篷愛日明
偶思前世事因見古人情
自顧知何益詩書浪得名

漢江曉泛

城下扁舟發江清宿霧消
竹村迎岸出粉蝶背人遙
神

女無消息明珠久寂寥鹿門看漸近滿耳颯清飈

舟中遣悶

五日行不盡洞庭青草寬窮陰連旦夕客霧隱湖山詩
思雖難竭酒壺行復乾孤舟親愛遠何日暫為懽

近日收書漸多戲成

元凱真成癖收書日又多靜湏頻檢閱忙不廢吟哦得
意欲誰語感懷聊自歌忘形到爾汝膠漆豈能過

武陵曉泛

今朝風日好來泛武陵溪碧水寒依岸蒼林遠護堤沙
光搖野鳥人語散鳬鷺二月桃花發還應處處迷

院中遣興二首

為客知應久池塘夏景深圓荷高倚蓋新笋密成林山
鳥因時語陰蟲應節吟乾坤知帝力自許一生心

片雨過山城空階物意清黃梅拾又落翠蘚踏還生幾
許催詩景無端望國情蠻方耕事少烏府但橫經

夜坐偶書

夜夜燒官燭時時讀我書斗牛雙古劍天地一迂儒郡
邑三苗外風霜兩歲餘江湖懷魏闕似覺鬢毛疎

舟中三首

來往雖云數應無愧比江觀書心見獨操櫓韻聞雙岸
轉山相掩湍奔石互撞裁詩清興發晏坐啟船窓

石底明皆見清波淡不流幾年烏府客一葉楚江舟求
富知為妄存心得自由所欣安履順未必歎淹留

好在黔中地相留過幾年岸經冬嶺樹水宿夜灘船支

枕思前事清心憶往賢一陽看漸近吾道故應旋

黔江曉泛

五月蠻江漲官船泛泛輕波光一道白山色兩邊青只
有耽書癖都無報國能中原有家室終日望歸程

詩禮堂為衍聖公賦

洙泗趨庭日相傳自世家三千惟有敬一語自無邪喬
木參天色倚蘭繞砌花遺風從此地花雨被無涯

崇恩堂為衍聖公賦

赤帝趨朝日彤庭錫勞時宮壺霑寵渥命服被恩私遺
澤應無竭深恩勉自持高臺書盛事行見被聲詩

題風木卷

秋色滿天地寸心將若何行雲寧返迹逝水絕回波斷
織封蛛網殘篇掩蓼莪空餘東嶺樹向夕受風多

題瞻雲卷

遊子久行役松楸空係情幾經秋草合長見白雲生水
映遙空淡烟迷暮壟平鶴歸華表夜滄海月虛明

人日立春

人日逢春日韶華此又新暫歸持斧客猶是讀書人別
久交游敬年深骨肉親昇平占霽景愛國賦詩頻

村居

喬木荒村古歸來遂所居人情安瓦落機事識舟虛歲
晚霜橫野宵長月照書心田恐蕪沒不敢廢耘鋤

讀書

俯仰千年道常看萬卷書鬢毛魚黑白事業尚鉛朱庭

雨催寒早窻風度月虛撫時寧浪出慨想北溟魚

中秋夜諸生持酒至二首

憲府乘驄入湖南伏斧遊異鄉饒節序故里忽中秋白
月當空度明河入夜流諸生勞載酒堅坐看相酬

五見中秋節湘南想北州忽看今夜月忘却昔年愁汾
水通河漢龍門近斗牛霜鍾傳永夕高詠未能休

示弟瑋

大屋星霜久新年雨雪頻田園知己薄生計可忘勤喬

木宜思祖雞豚莫惱鄰東堂花幾樹應與歲俱春

聞張侍御陞大理卿復陞都御史

聞道張公子頻年被寵光一清廷尉法再肅栢臺霜絕
足風雲闊高門歲月長所期崇令德汗簡看垂芳

夏夜

肅肅涼景夕滿懷詩思生蟲鳴新雨霽鍾逋晚風清爽
氣浮天極鄉心對月明中州知久客歸興繞汾亭

挽吳孺人

高節知誰似終身不二天脩篁秋更綠老栢苦尤堅意
切和熊處心傷斷織前賢郎今有立紫誥責幽泉

直沽舟中

潮來兩岸平風順一帆輕海濶浮雲白天低野樹青久
叨持斧客非是棄縈生岱岳行看近秋高試一登

按部出濟南

雨歇西門道微涼草樹秋風雲連北極海岳接東州聖
世方全盛書生得壯遊頻年叨寵渥感激未能休

七夕宿郟城

郟子國中宿高堂
蠟炬紅滿林驚夜
鵲繞砌響秋蛩遠
意知誰省長吟未
許同去年當此夕
京國見西風

發長清

清曉出南郭
南行喜有山
入林秋霧薄
到面水風寒
已覺年華大
還應宇宙寬
幾回持憲節
不改鐵為冠

盧主事具慶堂

盧子古名族
幾年家大梁
未為觀國士
已作奉親堂
喬

木侵簷密芳花繞戶香春風長滿座永日但稱觴

登州抵福山道中二首

岡嶺高還下荒村斷復連波濤風捲雪島嶼日生烟水
坼人間境春融世外天雲霞今古異何處有神仙

正是春光好重來海上行輕鷗聯影落旅雁一行鳴徐
市三山棹安期萬古名只今俱泯沒惟見水雲平

潞河舟中

歲月忽如昨三年又此來水長通御苑山近繞金臺謬

擬傳心學慙無濟世才永懷清不寐終夕望三台

舟中思親

三十年前事舟中忽有思老親遊宦日巴蜀泛江時青
嶂兩邊合黃猿萬樹垂只今行海岱恐自受恩私

滄州舟中

瀟漫滄州北舟行逆水遲連林秋柳瘦接翅晚鴉稀原
野波濤減人家生理微端居對明燭深念莫相違

病齒

病齒經時久憂煩屢攪腸吟哦良覺廢誦讀總相妨志
切風雷益心懲噬嗑剛古柔無所苦因悟養生方

賜紗

理寺承恩召宮紗被寵光紅酣昇海日濃染自天香省
德知輕重裁衣稱短長章身良自愧何以報皇唐

賜扇

勅賜端陽扇雲箋五色花動搖煩暑退披拂好風斜法
語真堪畏湯銘恐未加

扇兩面細書皆聖賢訓戒之言

身心蒙帝力留

與子孫誇

登南坡

雨霽陟岵崑涼風作陣飄目隨青嶂遠心與白雲高野
草連岡細家林百尺喬茫茫天宇內倦鳥已安巢

漢江源

巨峽自天闢峨峨嵒冢尊迴環幽谷底清淺漢江源泉
古通元氣根深徹后坤朝宗東去意應不廢晨昏

嘉陵泛江

湛湛嘉陵水沉沉石底明岸翻雲樹影谷響棹歌聲微
冷南風細輕陰暮雨晴應難逢此景還慰遠遊情

嘉陵江雨

官舫泛嘉陵渾如一葉輕灘高駭浪急岸闊漫流停山
木無邊翠人烟幾處青棹歌高枕聽竟日雨冥冥

雨後宿嘉陵

夜宿嘉陵岸扁舟雨不休山雲迷澗壑林火射江流久
坐思王事難眠動旅愁所期氛祲掃走馬上神州

嘉陵喜晴

不堪蓬背雨直打到天明乍喜朝雲歛俄看旭日晴林
分千嶂秀山空一江清泛泛情何極舟人急櫓聲

錦城寓館八首

寓館富花竹書齋夏日長芭蕉紅錦秀梔子白花香樹
密寧知暑窻開但覺涼遠懷雖暫遣世慮未能忘

曲逕通幽處交陰翠竹高書齋成雅趣花園愜遊遨石
甃涵天影風林作海濤寧知城市內清境勝江皋

細雨過空庭纖纖草色青涼風生近戶淡靄散高冥林
外鶻聲急簷前燕語輕錦城雖可樂終是念歸程

當戶海榴樹紛紛落絳英竹林新笋出石砌綠苔生小
屋知心靜繁花覺眼明少陵今遠矣誰與論詩情

偶居錦城館還似浣花堂雨過青苔潤風來翠簾涼竹
鳴瀟洒韻花送自然香清興雖無盡鄉心未可忘

紅芳經雨重翠竹引風多生意每如此天心奈樂何一
杯吾自勸隔戶鳥當歌忽起鄉關念條山繞大河

清晨坐書閣初日照花林宿露泣庭竹晴天囀野禽心
無一念雜窻絕半塵侵道理無邊在悠然思轉深
閒坐竹林內風來見籜飄輕烟晴冉冉涼氣晚蕭蕭易
古還宗邵書刪却自堯莫嫌耽典籍清景羨相調

有感五首

火發木將燬姦生理自危洞觀千古事深合一時為往
事既如此來蹤可更追爾心徒自省吾道欲何之
誰使三苗叛深勞王者師操兵諸將勇轉粟萬人疲行

見投戈日還看奏凱時犬狼何足道雨露本無私

錦里南天外中原北斗邊乘軺孤節遠戀闕寸心懸鴈塞氛常淨龍沙駕已旋忠臣扶社稷快著祖生鞭

庶官務割剝不念遠人窮况復羽書急時兼饋餉供探兵林莽密轉粟水山重指日兵氛掃車書四海同

禁闥知無補江山敢憚勞運糧民力困討賊將心驕圍解人饑死蠻窮縣刼燒貪官能致亂選牧望天朝

錦城館雜題十三首

竹

誰種庭前竹蕭森數十竿
高簷晴落翠虛室晝生寒
韻喜風前聽陰宜月下看
莫言家在遠長得報平安

榴

細葉枝枝翠嬌英朵朵紅
愛看房有實不信色為空
迎夏葵爭發傾陽意畧同
因之思漢武花滿近郊濃

芭蕉

弱植亭亭立新枝
漸漸開自能承雨露
元不愧塵埃藥

艷抽紅錦陰長落翠苔
新詩題滿葉秋意莫先來

木瓜

窻外有奇樹木瓜枝相交
幸自少酸味何由動老饕
香氣頗幽馥鳥聲恒寂寥
莫為相好贈却恐報瓊瑤

櫟樹

小圃高櫟樹亭亭迥出雲
近身皮盡古到頂葉纔分
性直鍾元氣根多托厚坤
幸茲無剝削生意得長存

笋

為是根延蔓因知笋易生破苔錐快利穿砌角崢嶸
解龍蛇蛻梢翻翡翠翎漸應為勁節行復上青冥

梔子

梔子湖湘見重看
在錦城花如梅蕊淡香比木犀清會
取風霜實還添藥餌名莫嫌滋味苦利益似忠誠

木犀

愛此木犀樹青青長近階
每承朝露重長引夏風來嘉
卉應難得高人喜賸栽不知歸去日還得見花開

盆池

圓盆為池底方石為池鉉貯水無多子涵光亦有馬影
隨庭下樹雲度鏡中天好似人心靜森然萬象全

雙栢

北山多古栢此地少為奇並長庭階下雙承雨露滋貞
心惟我共苦意只天知清影尤宜夏時來一翫之

草

密密庭前草纖纖每易生細搖風葉軟微綴露華明生

意知無間乾坤太有情不除思茂叔心與共欣榮

花臺

臺累層層級花開種種香雨過苔色淨風動樹陰涼高
下當虛牖依稀近小堂讀書頻對此瀟灑意何長

竹徑

竹徑通書室行來宛轉深舉頭交翠葉步履踏清陰舊
籜頻飄地新篁亂滿林好風涼不斷洒洒滌塵襟

竹下四首

翠擁如雲竹門開一逕深成林常少日接葉自多陰山
鳥時聞轉風蟬忽聽吟把書閒讀處涼籟覺心清

愛此竹林僻千竿翠葉交濕衣清露重到面好風飄旋
解龍鱗籜新抽鳳尾梢逕幽仍宛轉聊此慰逍遙

夜雨朝來霽閒從竹下行尚餘零露濕倍有好風生凌
亂陰還厚飄蕭韻自清獨高君子節長結歲寒盟

積雨苔長潤生風竹自涼誰開延客逕舊作讀書堂魚
躍盆池水花傳爇牖香清心時宴坐遠意到羲皇

有悶二首

盛夏不興師如何動鼓鼙誕敷今已遠來格爾何遲火
嶺安營苦炎荒轉粟疲會應霖雨降早見洗兵時
五月北風多聲來撼遠柯飄蕭今已甚震蕩復如何昧
昧思嘗膽紛紛謾擁戈唐時洗兵馬誰為挽天河

遣懷

如何三月外猶未得家書為少南來鴈因稀北上魚謾
叨新使節祇想舊田廬旦夕聞消息中懷暫一舒

聞道四首

聞道徵南將長驅十萬兵天威除獬豸妖宿掃撓搶路
闢烟塵息城開子女迎還當布恩信長見八蠻清

大將總雄師三苗勢已衰重圍方解日梗路漸通時荒
破宜興復瘡痍在保綏安邊有長策華夏樂雍熙

兵勢如破竹長驅甚建瓴已應徭種遁還見鬼方清恩
信要湏布干戈可暫停但令疆圉靜休慕簡編青

苗頑從古昔醜類近尤乖月暈城遭困蜂屯路不開王

師天上降虎將日邊來一掃蠻荒靜從容奏凱迴

五丁峽

巨峽二千里天開幾萬年泉飛林杪雨雲合管中天一
水橋頻度層崖石亂懸梁州舊禹跡繆矣五丁傳

入徐州境

春首及徐方行來道路長殘冰餘積水霽雪帶連岡遠
野通淮甸懸流近呂梁征鞍行可解不日上舟航

古滕薛城

纔過古滕國還瞻舊薛城
分封遺壞堞列爵但虛名
冉冉春烟淡悠悠野水清
望中今古意信馬獨含情

高郵阻雪河水

淮海連朝雪官河一夜冰
虹橋千里直鯨浪兩堤平
履薄應難渡舟膠不可行
會須融皎日波軟片帆輕

登孟城驛樓

驛樓清望遠漫漫野湖平
雪樹迷村白沙鷗泛水明
春烟浮近市午日照高城
何限船依岸危檣出杳冥

金陵官舍

宛轉通橋水依稀屋近城池塘經雨濁睥睨映天青檻
柳回春色園禽變曉聲官居能有此聊可豁高情

江道士涵碧軒

飛閣環流水層軒面面開虛澄涵倒影淨碧絕浮埃鏡
裏閒雲度潭心爽氣來道人能有此還似小蓬萊

螢

知爾最微細長因腐草生柳邊添箇箇竹裏亂星星歲

月驚時序乾坤見物情莫言光耀少還是黑中明

樵雲野老

自得山中趣都忘世上名閒尋肥遯侶共作斫雲行決
決溪流響丁丁谷應聲偶然值漁者問答有深情

睡起偶題

睡起涼風入空庭過雨餘幾竿窗外竹數卷案頭書欲
淡心無競官閒樂自如老知安所寓不復更區區

楊尚書邀飲

好客楊司寇招邀酒屢傾
四筵羅綺食滿座列豪英
壺矢投何急觥觴亂不停
猶言情未盡別上水心亭

送俞侍郎歸江南

官僚新寵數藻鑑舊光輝
正擬承恩大俄看賜告歸
征帆千里發旅鴈一行飛
勿藥應添喜重來覲衮衣

將歸山西留贈陳廣文三十韻

八月中州地秋光動客懷
氣清行少昊令肅掩帙台
樹老蟬俱寂葭黃鴈正來
寒流澄靜碧晚岫拔崔嵬
紅熟

風林棗青生雨砌苔候蟲聲唧切砧杵韻喧歷上下璣
衡轉西南斗柄迴憶從朝鳳闕便爾別金臺來往家山
道留連索水隈古情吟楚漢高義得陳雷屢和鏗鏘韻
頻傾瀲灩杯未窮詩酒興俄動蓼莪哀往苒逾三載栖
遲愧寸才聊為萍水別近擬故山回秋意方如此交情
每快哉應同楚地橘濫比傳岩梅晚節看松桂殊芳異
草萊故應嗤樸樸深是重竒瑰意得寧煩語心通不假
媒素懷期坦率俗意絕嫌猜白壁寧容垢青銅未可埃

我行方浩蕩君意莫徘徊砥柱洪河圻金天華岳開驛
亭頻莫柳郵舍幾陳荻汾水秋浮浪孤山晚作堆兒童
應項領父老想樽壘原栢心先折庭梧手自栽昊天恩
罔極風木意難裁未遂林鳥報頻驚隴鶴催還當訪知
已鳴佩覲天階

曉登沅州北山頂

嵐靄氤氲重溪行咫尺迷漸登層巘上始覺衆山低遠
近天無際參差樹不齊川雲平似海石磴峻如梯日出

寒烟外風生碧澗倪異禽和露宿快馬度空嘶遠目回
三蜀高懷遍五溪歸朝誇勝槩沅水有新題

戲題紅白二梅花落

簷外雙梅樹庭前昨夜風新英兼舊蕊墜粉間飄紅已
見苔成錦方疑色是空粧娥初點額舞女欲迷蹤雨重
胭脂濕泥香瑞雪融不知何處笛併起一聲中

喜雨四十韻

天地開明運風雲各有人道回千古泰氣統一元春合

樂來儀鳳編詩詠瑞麟杞楠求偉器瑚璉重奇珍竊抱
風霜志榮瞻日月新繆膺三鳳薛敢比八龍荀早歲心
雖壯中年學未醇上書希賈誼著論過嬴秦跡忝鰲頭
客官為易角臣憶從簪白筆寧敢愧蒼旻持節南荒外
懸旌北海濱幾看星轉斗頻見月飛輪疾惡寧留枉存
心但有仁股肱恢漢道耳目廣虞詢沅澧時清歲衡巫
景宴辰驕陽嗟久亢膏澤仰惟均使者應無色官曹想
未循黎元疲畎畝巫覡走村隣偏側憂羣志安榮愧此

身靈幽寧可必衷曲謾潛陳帝德深涵物天心遠愛民
化機回頃刻沛澤匝羣倫婦子皆宜室兒童總孝親甄
陶歸廣大笑語極詳諄已卜年皆有還應俗盡淳疋羸
躋壽域苗獠變儒紳沴氣全知歇休徵屢覺臻商羊方
罷舞尺蠖會求伸魚目難容偽明珠賴倚真積虔纔曠
日志喜不逾旬野遍秋前綠衢消霽後塵亨豐原有數
貞勝豈無因荆俗猶欽鬼黔靈早降神華風人共靡大
道子能遵時譽難稱實佳章枉見申功因簣土積學比

大田昀物備應知富神充不累貧詞華兼問晉風雅獨
傳幽自顧心如雜相期德在純從容江漢日行見起垂
綸

寄司封李原德三十韻

磊落青雲士龍門憶共遊蒹葭汾水暮松桂禹宮秋架
石千尋閣盤空百尺樓兩山開翠峽萬里滾黃流弱水
崑崙外扶桑滄海頭山川窮壯觀物理入冥搜勝地杯
同酌清心道共謀真傳推舜禹正學拱軻丘每苦紛紛

論誰能坦坦由濂伊勞績述閩建得尋拙自此陽光發
還應爍火收劇談憐繾綣良覲展綢繆日月開皇極風
雲會帝州一官陪舊侶三俊話前脩待漏金門闢趨朝
紫氣浮方期聯彩鳳又見促鳴騶盛典旁求遠天書寵
渥稠遷喬登粉署持節騁華輶火改時頻易杓移斗屢
周緘書知習坎申意見中孚理大天無外毛輕德可倚
謬推追電足深仰遡源舟一別三年久重來數日留玉
瓶携綠蟻珠唾雜銀鈎又見逢離索那能足倡酬清霜

京邸月疎柳禁城溝遠意煩深念高文可更求士希賢
作聖道仰魯傳鄒歲月雖云邁詩書敢自休論心殊未
悉短札暫相投

喜雪

正統四年十一月十六日子出按所部時不雨者
殆兩月矣麥雖出土而根苗浮露遊塵遍野土脉
不能凝潤將無以為來歲發生之機所過居氓
行商以及部屬之吏咸戚然有憂色予亦同其

憂而時據鞍攬轡閔閔不忘於道途之間是月
二十六日抵東昌之博平大風連日天微有陰
色予意以為將雪之徵二十九日早發博平風
止雲合雪遂作中途雪大作至清平連三日夜
雪乃止瀰漫千里皓然一色由是民吏釋然大
悅相賀以豐年之兆灼灼可驗予亦喜不能已
遂賦律詩三十韻以紀其事是冬十二月朔日
書

トニシヤル

冰泉平野迷霜蹟遙山聳白巔影窺瑤水鶴人舞桂宮
仙庭栢欺寒色林花開曉妍八荒開瑩潔萬象失蒼玄
肅肅氛埃歇飄飄沴氣捐已應消螭螭重覺伏螟蜥節
轉和平候時占大有年玄功歸紫極上瑞繼青編禾紀
雙莖異雲歌五色鮮鳳麟來曠邈龜馬出淪連盛事宜
方駕貞符足並肩腐儒叨際遇帝力荷陶埏雅頌知非
職歌謠竊自傳

古人作雪詩禁用體物予詩中於柳絮梨花

如銀似玉之類皆置不用亦古人之遺意歟

送王秀才

歷下山川秀高亭古製存朱闌環碧沼綺席擁金樽李
杜來賓客機雲列弟昆清言鳴佩玉雅奏雜箎塤自昔
稱名勝於今數大藩雲烟通海島峯嶺接天門正是霜
空肅那堪葉落繁高城連粉堞周道駐華軒良會今如
此高情可更論芝蘭爭奕煜鴻鴈各飛翻天上歸寧後
還來敘作歡

曉出東平州十韻

憲節凌秋發城門
逼曉開溝長流水去
野曠遠風來跋
馬橋頻度看山客
屢回川原行未已
齊魯望悠哉
漢檢

天門石

漢封禪於此

秦碑海岸臺

秦刻石處

淡烟橫曲阜日上

蓬萊遺蹟懷前古
觀風慰好懷
衢樽湏共飲
井稅不煩催
每見桑麻野
深期杞梓材
行歌方自得
前陟更崔嵬

挽徐憲使三十韻

梁園春寂寞
共嘆哲人凋
自是鍾神秀
原應降岳喬
劬

書當早歲窮易每通宵遠念韋編絕潛觀法象昭數從
環內起心向畫前超甲子開文運寅正建斗杓豹斑深
積霧鵬翼快扶搖海內時名大關中教澤饒方看來鶴
雀行復降星輶地切神仙府人瞻玉雪標旋應陪馭鶴
長是綴班貂啟沃師甘尹開陳仰姒姚緝熙惟一德誠
孝每三朝龍袞登宸極離明麗遠霄周旋觀盛禮寵數
冠羣僚又見橫英蕩遙知格有苗霜臺俄拜命驄馬屢
揚鑣路出荆門險封連晉水遙情非鷹隼擊心與鳳鸞

要政簡民無擾風清吏不驕兩邦懷舊德千里守新條
魏關心仍結鵷行首屢翹人期黃髮在鄉有白雲飄列
郡愁空劇孤魂去不招野棠還簇簇臺栢自蕭蕭丹旌
飛雲遠青山積雨消羊腸高岌業馬鬣鬱嶢嶢客憶曾
遊寺人憐舊度橋儀刑傳父老名姓到漁樵事業歸良
史豐碑閼伯高


酬李吏部韻

祇是尋章句何曾學聖賢寸心徒炯若兩鬢已蒼然汎

汎應難及區區只自專妙非探月窟蒙有玩山泉希復
勤晨誦多應懶晝眠簾涼紋似水窓寂帳如烟正起端
烏帽俄承送錦箋騰空蛟勢矯出海蚌珠鮮述作淹羣
籍吟哦盡一篇卦看脩省震天悟性情乾便擬師兼良
誰勞說又玄茅心知我塞水智羨君圓德業勤磨玉功
名頻著鞭沉潜知理奧明炳識幾先自是中情固寧教
外物遷晴窓看野馬碧漢仰飛鳶欲識無邊道須知不
外天味深玄酒酌聲淡伯牙絃佳士宜紉蕙高人獨愛

蓮化機寧有息雅興自無邊寶瓚湏金飾羔裘有豹緣
翱翔還接翼出入最差肩肺腑真傾瀉詩書已貫穿天
官留藻鑑匠氏備榱桷矩誠前定方圓自不愆門清
真似水道直更如弦榦有千尋聳金更百鍊堅但教孤
節茂羸取大名全自愧方知學深思未可權交情殊滾
滾高論竟連連尚覺中懷劣難勝外慮牽何時除舊習
但日竊陳編大意全無見幾微總未研真誠誇末學寧
敢接先傳浩蕩乾坤大推遷歲月延海波應渾渾蠱挹

繆涓涓有蘊川光媚深藏寶氣纏珠還寧買積魚得可
忘筌舊業勞鑽仰新知可棄捐斯文終古在共覩日星
懸



敬軒文集卷六